



Sesida dals

26 da favrer 2019

Communitgà ils

27 da favrer 2019

Protocol nr.

122

Incumbensa Rettich

concernent posts da contact e da consultaziun per personas dependentas da drogas

Resposta da la regenza

En la politica da drogas s'orientescha il Grischun a la strategia naziunala davart la dependenza ed al model cumprovà da 4 pitgas: "prevenziun, terapia/reintegraziun, reduenziun da donns/agid da survivenza e repressiun". Ina purschida da prevenziun da toxicomania e d'agid en cas da toxicomania che correspunda al basegn vegn messa a disposiziun en il chantun sin basa da la lescha davart l'agid per personas toxicomanas en il chantun Grischun (DG 500.800).

Las suandantas purschidas èn avant maun en il chantun en ils secturs terapia/reintegraziun e reduenziun da donns/agid da survivenza:

- Per incumbensa dal chantun maina l'uniun per l'agid da survivenza dal Grischun in post da contact e da consultaziun a Cuira. Quel porscha – ultra da la structura dal di e da la cussegliaziun nunbirocratica – er in dormitori d'urgenza ed ina cuschina per personas senza tetg e per personas basegnusas. Plinavant porscha l'uniun ina intermediaziun da lavur, in abitar assistì ed in accumpagnament extern d'abitar. Sin tut l'areal da l'uniun èsi scumandà da prender cun sai u da consumar alcohol e drogas illegalas.
- L'ambulatori Neumühle a Cuira è en il Grischun il center per tractaments che sa basan sin opiats. Quels cumpiglian il tractament cun prescripziun da heroin sco er ulteriurs tractaments cun substanzas da substituziun. Ultra da quai vegnan mess a disposiziun in tractament ed in'assistenza medicala, curativa e psicosociala sco er ina cussegliaziun per dumondas da dependenza.
- Ils servetschs psichiatricis dal Grischun (SPGR) porschan plazzas da terapia per personas cun dependenzas, en spezial en il center da dependenza Danis da la clinica Beverin a Cazas.
- Il servetsch social per dumondas da dependenza a Cuira ed ils servetschs socials regionals en las ulteriuras regiuns dal chantun porschan ina cussegliaziun per dumondas da dependenza ed ina cussegliaziun sociala per personas pertugadas e per lur confamigliars.
- Per incumbensa dal chantun porscha la Crusch blava dal Grischun ina cussegliaziun spezialisada en cas d'ina dependenza d'alcohol per personas pertugadas e per lur confamigliars.

La scena da drogas sa mida permanentamain. La scena visibla en il parc municipal da la citad da Cuira è enconuschenta. Là sa trategnan differentas gruppas d'umans cun in problem da dependenza. Per l'ina èn quai umans che han en emprima lingia ina dependenza d'alcohol. En cas excepziunals n'han questas personas nagin suttetg e vegnan tgiradas per regla gia dapi in tschert temp dal servetsch social per dumondas da dependenza, da la Crusch blava, da l'uniun per l'agid da survivenza u

dal medi da chasa. Per l'otra sa tracti d'umans che fan ina terapia da substituziun e che consumeschan supplementarmain substanzas legalas u illegalas. Pervia da lur malsogna da dependenza vegnan questas personas accompagnadas en dumondas medicinalas, terapeuticas u psicosocialas – almain per part – dal servetsch social per dumondas da dependenza, da l'uniun per l'agid da survivenza, da l'ambulatori Neumühle u d'in medi da chasa. La finala datti anc ina gruppa d'umans che refusa las purschidas da sustegn avant maun, sajan quai terapias, cussegliazions per dumondas da dependenza, lavur sociala, purschidas nunbirocraticas da structuradas dal di u autras purschidas d'agid. En cas da las duas gruppas da personas menziunadas sco ultimas han ins constatà en circuls d'expertas e d'experts (uniun per l'agid da survivenza, servetsch social per dumondas da dependenza, ambulatori Neumühle, polizia) in augment dal consum da cocain en il parc municipal durant ils ultims onns. Il consum da cocain chaschuna adina puspè ina "atmosfera da tensiun" en la scena ed i vegnan constatads tar las personas pertutgadas adina pli savens problems da sanadad e socials pervia da la malsogna da dependenza. Ina survista cumpletta dals problems e da la situaziun actuala en tut il chantun n'exista però betg.

Experientschas concernent posts da contact e da consultaziun che han in local da consum èn fin ussa avant maun mo da las citads pli grondas sco per exempel Basilea, Turitg, Berna u Lucerna. In rapport dal chantun Basilea-Citad – che ha ina politica da drogas complessiva, lantschada gia l'onn 1991 – mussa che posts da contact e da consultaziun per personas dependentas da drogas na chaschunan betg ch'il commerzi ed il consum da drogas illegalas svaneschan dal tutfatg dal spazi public. Sco consequenza da quai èn vegnidas realisadas a Basilea ulteriuras mesiras en il punct da contact dals secturs reducziun da donns e repressiun. Latiers tutgan purschidas en il sector da la lavur sociala visitanta sco p.ex. street worker (explicaziun dal concept da la politica da drogas dal chantun Basilea-Citad, rapport da la cumissiun da sanadad e dals fatgs socials dal cussegl grond, zercladur 2002). Sin basa da las experientschas ch'èn vegnidas fatgas en las citads numnadas qua survart stoi vegnir examinà, sche "posts da contact e da consultaziun per personas dependentas da drogas" èn per il Grischun ina soluziun che maina a la finamira e ch'è realisabla. En spezial ston vegnir sclerids ils lieus pussaivels, ils gestiunaris pussaivels, ils custs ch'èn da spetgar ed eventualas alternativas. Eventualas mesiras per meglierar la situaziun da personas dependentas da drogas ston vegnir adattadas al context dal chantun Grischun, per ch'ellas possian sviluppar lur effect. Cun elavurar talas mesiras stuessan vegnir observadas tut las quatter pitgas da la politica da drogas.

Sa basond sin questas consideraziuns propona la regenza al cussegl grond da midar questa incumbensa sco suonda:

Integrond ils acturs relevants e las personas decisivas (en spezial personas pertutgadas, personas da la cussegliazion e da la terapia per dumondas da dependenza, da la lavur sociala, da la lavur cun giuvenils e da la polizia) elavura la regenza entaifer ils proxims 12 mais in rapport davart la situaziun vertenta e davart il basegn d'agir pussaivel cun recumandaziun e cun lur custs.



En num da la Regenza

Il president:

Il chancelier:

Dr. Jon Domenic Parolini

Daniel Spadin